

29. juli 2021

UKA2021/94

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Qimmit qimuttut Qeqertarsuarmit 2017 kingorna piaqqiaasut tamarmik DNA-kkut misissortinnissaannik Naalackersuisut peqquneqarnissaannik Inatsisartuni aalajangiiffigisassatut siunnersuut. DNA-kkut misissuinerup takutissavaa qimminik akusaqalersimanersoq. Naalackersuisut peqquneqassapputtaaq qimminik akusanik nassaartoqarpat, qimmimik akusamik piginnittoq qimmiutini akusaasoq toqukkusunneraa paasiniassallugu.

(Inatsisartunut ilaasortaq, Doris J. Jensen, Siumut)

Tungavilersuutit:

Tamatta isumaqatigiissutigisinnaavarput massakorpiaq pisoq, tassalu Qeqertarsuarmit qimminik qimuttunik immikkoortitsineq taamatut ingerlaannarsinnaangitsoq – qimuttut inuussutissarsiuutigalugu imaluunniit kulturikkut ukkatarigaanni.

Suliniutip Projekt Qimmip, uunga siunnersuummut assingusumik tigussaasumik siunnersutigisimavaa – DNA-kkut misissuisoqarsinnaasoq¹. Qimmit qimuttut 2017 kingorna piaqqiaasimasut tamarmik misissornerini, nalilerpara, qimmit akusat tamakkerlugit ilisarineqalersinnaasut qimmip avataaneersup DNA-kkut ilisarnaatai ersersinneqalertussaammata, tassami qimmimik avataaneersumik eqqussuinermik pasilluteqarneq ukiup 2017-ip aallartissimalaernerani pisimammat.

DNA atorlugu qimminik misissuineq iluatsissappat, taava Naalackersuisut qulakkeeqqaassavaat, qimminik piginnittut inatsisitigut² chip-ilersuinermik piumasaqaataasoq naammassisimassagaat. Chip-ilersuineq naammassisimanngippat, taava tamanna isumagineqartariaqassaaq, qimmit DNA-kkut misissortinnerminni ilisarineqassappat³.

Nalungilara Naalackersuisut inatsisissamik tusarniaatitsisimasut tassanilu ilaatigut iliuusereriikkaminnik kingunerititassat ilanngussimagaat. Taamaattoq siunnersuutip isikkivissavia suli paasilluarsimanngilara qanoq isikkoqartinniarneqarnerasoq. Nalungilara qimmiutillit ataasiakkaat nammineq qimmiutitik akisussaaffigigaat, taamaattoq isumaqarpunga qitiusumiik ikiuinissamik pisariaqartitsisoqartoq, taamaalilluni Qeqertarsuaq illoqarfittut immikkoortitaajunnaarniassammat.

¹ <https://knr.gl/kl/nutaarsiassat/knqk-qeqertarsuarmit-qimmit-qimuttut-marluk-allanertanik-akusaasimapput>

² Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata nr. 24, 28. november 2016-imeersup allanngortinneqarneranik Inatsisartut inatsisaat.

³ Imm. 3.1. malillugu Namminersornerusut chip-imik meqqiliineq akilertussaavaat.



Isumaqarluinnarpunga Qeqertarsuarmi qimmiutillit aamma soqutigissagaat illoqarfiup qimmiutaannut pasilluutaasartut unitsittariaqalersut. Neriuppunga Inatsisartut siunnersuutiga ilassilluassagaat.

Pisortanut aningaasaqarnikkut allaffissornikkullu sunniutigisassai:

Københavnip Universitetiani Sulisoq Wildlife Forensics Facility-meersoq qimminik qimuttunik DNA-kkut saaffiginnittareerninni misissuinnermi akinik nalilersuisimavoq, imatullu akeqassaaq:

- Ca. 50 stk. = 4000,- misilitsinnermi ataatsimi
- Ca. 100 stk. = 3000,- misilitsinnermi ataatsimi
- Ca. 150 stk. = 2500,- misilitsinnermi ataatsimi
- Ca. 200 stk. = 2000,- misilitsinnermi ataatsimi

Paasinnittaasera malillugu, qimmit qimuttut Qeqertarsuarmiittut 2017-imiit 2020-imut piaqqiorlutik kinguaassiorsimasut tamarmik 210 missaanniipput. Tamanna ilumoorpat taava aningaasartuutigissamaakkat katillugit 320.000-400.000 kr. missaannissaapput.

Sulisup aamma ilisimatitsissutigaa, allakkatigut nalunaarsuinnermi aningaasartuuteqartoqarsinnaasoq, qimminik akusanik nassaariataassappata.

Kiisalu aamma naatsorsuutigineqassaaq Namminersornerusuniit ataqatigiissaarisussamik atuisoqarumaartoq – tamannalu AC-ertut atorfimmik ukiup ¼-a annertunerpaamik atuiffiusaaq.

Privatimik inuussutissarsiortunut aningaasaqarnikkut allaffissornikkullu kingunerisassai:

Soqanngilaq.

Aningaasaqarnikkut allaffissornikkullu innuttaasunut kingunerisassai:

Soqanngilaq. Illuatungaani Qeqertarsuarmi qimuttunik qimmiutillit qeqertarsuup avataani atuleqqissinnaassavaat qimmeqarfiusuni allani akusaasunik qimmeqalersinnaanissaa ernumatiginagu.